

Unisza, Unas jalin kerjasama pertukaran mahasiswa, pakar

GONGBADAK—Universiti Sultan Zainal Abidin (Unisza) dan Universiti Nasional (Unas) Indonesia telah menandatangani Memorandum Persefahaman (MoU) ke arah menjalin usaha sama dari segi pertukaran mahasiswa, pakar dalam sesuatu bidang, aktiviti pertukaran budaya serta penyelidikan bersama.

Naib Canselor Unisza, Prof Datuk Dr Yahaya Ibrahim berkata, MoU berkenaan adalah antara usaha meningkatkan aktiviti penyelidikan selain pertukaran pakar yang mahir dalam bidang tertentu antara kedua-dua buah universiti berkenaan.

"Banyak penyelidikan yang boleh dijalankan antara Unisza dan Unas termasuk dari segi budaya, keusahawanan dan sebagainya, dengan membabitkan dua negara, iaitu Malaysia dan Indonesia.

"Kita boleh buat kajian mengenai batik Indonesia dan Malaysia yang tentunya mempunyai ciri dan keunikan tersendiri," katanya pada majlis menandatangai MoU di Dewan Senat, Unisza, Kampung Gong Badak, disini, semalam.



Dr Yahaya (kiri) bertukar dokumen MoU dengan Amry Bermawi (kanan).

Dr Yahaya telah mewakili Unisza untuk menandatangani MoU berkenaan dengan disaksikan Timbalan Naib Canselor, Penyelidikan dan Pembangunan, Prof Dr Mohd Ekhwan Toriman, manakala Rektor, Yth Bapak Dr El Amry Bermawi Putera mewakili Unas dengan disaksikan Ketua YMIK, Yth Bapak Dr Ramli Siregar.

Delegasi Unas membabitkan 43 individu terdiri daripada rektor, pengurusan tertinggi, dekan-dekan dan mahasiswa yang mengadakan kunjungan hormat selama lima hari ke Unisza bermula 1 November lalu.